

Martin Obbard, deisebwr

09 Chwefror 2021

Annwyl Mr Obbard

Deiseb P-05-1125 - Dylai deisebau sydd â dros 5,000 o lofnodion fod yn destun dadl, yn hytrach na chael eu hystyried ar gyfer dadl yn unig

Diolch am gyflwyno'r ddeiseb uchod i'r Senedd. Rwy'n ymateb iddi gan mai'r Pwyllgor Deisebau sy'n gyfrifol am y prosesau ar gyfer trafod deisebau.

Mae'r Pwyllgor Deisebau yn cynnal gwaith craffu ar bob deiseb sy'n casglu dros 50 o lofnodion. Cafodd y trothwy ar gyfer penderfynu a ddylai'r pwyllgor wneud cais am ddadl yn y Cyfarfod Llawn, ei gyflwyno gan y Pwyllgor Deisebau ym mis Mawrth 2017. Gwnaed hyn yn sgil ymgynghoriad â'r Pwyllgor Busnes, sy'n gyfrifol am drefnu busnes y Cyfarfod Llawn. Cyn hynny, roedd deisebau ond yn cael eu trafod gan y Senedd gyfan os oedd y Pwyllgor Deisebau wedi llunio adroddiad arnynt yn seiliedig ar ei waith craffu manwl.

Ein nod wrth gyflwyno'r drefn hon oedd cynnig ffordd fwy uniongyrchol ac amserol i ddeisebau sy'n denu lefel uchel o gefnogaeth gan y cyhoedd gael eu trafod gan y Senedd lawn, heb iddynt orfod bod yn destun gwaith craffu gan bwyllgor yn gyntaf. Ar adeg ysgrifennu'r ohebiaeth hon, mae 19 o ddeisebau wedi'u trafod yn y Cyfarfod Llawn fel rhan o'r trefniadau hyn, ac rwy'n falch bod y broses hon wedi rhoi cyfle i nifer o faterion pwysig gael eu trafod yn y modd hwn. Mae manylion yr holl ddeisebau a drafodwyd gan y Senedd hon ar gael drwy'r linc a ganlyn: <https://deisebau.senedd.cymru/deisebau?state=debated>

Fodd bynnag, rwyf o'r farn ei bod yn gywir inni ystyried nifer o ffactorau wrth benderfynu a yw'n briodol cynnal dadl brydlon ar fater a godir gan ddeiseb, ac mae yna nifer o resymau pam nad yw'n ymarferol nac yn briodol cynnal dadl ar bob deiseb sy'n casglu'r nifer ofynnol o lofnodion. Er enghraifft:

- mae'n bosibl y bydd y mater a drafodir mewn deiseb wedi'i ddatrys ers cyflwyno'r ddeiseb, neu bod y cyd-destun wedi newid yn sylweddol;



Senedd Cymru
Bae Caerdydd, Caerdydd, CF99 1SN

✉ SeneddDeisebau@senedd.cymru

☎ 0300 200 6565

Welsh Parliament
Cardiff Bay, Cardiff, CF99 1SN

✉ SeneddPetitions@senedd.wales

☎ 0300 200 6565

- mae'n bosibl y bydd y mater eisoes wedi'i drafod yn ddiweddar, wedi'i godi mewn ffyrdd eraill neu wedi bod yn destun gwaith craffu gan un o bwyllgorau eraill y Senedd;
- mae'n bosibl y gellir cynnal gwaith craffu ar y mater o dan sylw yn fwy effeithiol, drwy waith craffu manwl gan y Pwyllgor Deisebau neu gan un o bwyllgorau eraill y Senedd; neu
- mae'n bosibl bod y ddeiseb wedi casglu cyfran sylweddol o'i llofnodion y tu allan i Gymru.

At hynny, capasiti cyfyng yn unig sydd gan y Senedd i drefnu dadleuon yn y Cyfarfod Llawn, ac mae yna nifer o alwadau ar y capasiti hwnnw, gan gynnwys dadleuon a gyflwynir gan bwyllgorau eraill, grwpiau gwleidyddol ac Aelodau unigol o'r Senedd. O ganlyniad, rydym yn ceisio defnyddio'n disgresiwn i sicrhau bod y system yn cael ei defnyddio i hwyluso'r gwaith craffu mwyaf effeithiol a phriodol ar y materion a godir drwy'r broses ddeisebu.

Yn olaf, mae'n bosibl eich bod eisoes yn ymwybodol bod y Pwyllgor Deisebau wedi gwneud y penderfyniad anodd o gynyddu'r 'trothwy ar gyfer cynnal dadl' ers i chi gyflwyno'ch deiseb. Rhwng mis Mawrth 2017 a mis Tachwedd 2020, y trothwy ar gyfer trafod deiseb mewn dadl yn y Cyfarfod Llawn oedd 5,000 o lofnodion. Fodd bynnag, ers 1 Rhagfyr 2020, mae'r trothwy hwn wedi cynyddu i 10,000 o lofnodion.

Mae'r pwyllgor yn dra ymwybodol o'r angen i rannu gwybodaeth glir er mwyn helpu i reoli disgwyliadau pawb sy'n manteisio ar y broses ddeisebu. Gwnaethom y penderfyniad hwn mewn ymateb i gynnydd sylweddol yn nifer y deisebau sydd wedi casglu nifer fawr o lofnodion ers canol y llynedd oherwydd, yn gynyddol, roeddem ond yn gallu trefnu dadleuon ar nifer gymharol fach o ddeisebau a oedd yn cyrraedd y trothwy blaenorol. Byddwn yn parhau i adolygu'r mater hwn hyd at ddiwedd tymor y Senedd hon, gyda'r bwriad o wneud argymhelliad cysylltiedig ar gyfer y Senedd nesaf.

Hyderaf fod yr ymateb hwn yn ddefnyddiol o ran egluro'r prosesau sy'n helpu'r Pwyllgor Deisebau i benderfynu pa gamau i'w cymryd, ac edrychaf ymlaen at glywed unrhyw sylwadau eraill sydd gennych, a fydd yn helpu i lywio trafodaethau'r pwyllgor ar eich deiseb.

Yn gywir,



Janet Finch-Saunders AS
Cadeirydd



Senedd Cymru
Bae Caerdydd, Caerdydd, CF99 1SN

 SeneddDeisebau@senedd.cymru

 0300 200 6565

Welsh Parliament
Cardiff Bay, Cardiff, CF99 1SN

 SeneddPetitions@senedd.wales

 0300 200 6565